


ANG PAGPAHIMUTANG SA MGA DIYAKONO

 Ug, nga ang, ang una mao'y pagpahimutang og pipila ka mga diyakono sa iglesia. Ug ang gamay'ng iglesia nato dinhi adunay kaugalingong awtoridad. Wala kini og unsa man nga denominasyon o unsa man nga padalhan kini og mga diyakono, nagapili ang iglesia og iyaha mismong mga diyakono. Nagapili ang iglesia dinhi og iyahang pastor, nagapili og iyahang mga tinugyanan, nagapili sa tanan nga mosulod ug mogawas sa simbahan. Wala dinhi'y usa ka tawo nga adunay katungod nga magbuot-buot sa bisan unsa man, kondili ang tibuok iglesia mismo. Ug ang iglesia mao kadtong nagatambong dinhi ug nagasuporta sa iglesia pinaagi sa ilang presensiya, pinaagi sa ilang ikapulo ug mga halad, mao sila ang adunay legal nga katungod sa pagpahimutang sa mga giingon.

² Ug gusto kong pasalamatang ang nangaging board sa mga diyakono, ug gisulti ko kini dinhi alang sa tibuok iglesia. Kung ania man karon kini nga mga kaigsoonan, nga mao sila ni Igsoong Cox, Igsoong Fleeman, ug Igsoong Higginbotham ug Igsoong Deitzman, nakaalagad sila'g maayo kanato, nangalagad sa Ginoo, sa niini nga tabernakulo.

³ Ug matag panahon, sumala sa mga lagda sa iglesia, kada tuig, ang mga diyakono o mga tinugyanan awtomatikong nagakahuman ang ilang mga termino. Ug kung gusto nilang mobalik, okey ra. Kung dili na pud sila gustong mobalik, nan puede silang magbutang og ipuli sa ilang puwesto, niadtong mihawa sa board.

⁴ Ug niadtong miaging gabii nanawag ko sa board sa mga tinugyanan, ug nahitabo nga aduna na diay og bag-ong board sa mga tinugyanan. Namatikdan ko nga ania karong gabhiona si Igsoong Luther McDowell, malipayon kita nga ato siyang nakita dinhi, nga miyembro pud sa board sa mga tinugyanan kaniadto. Akong gituyoan og adto niining semanaha aron hibaloon ug susihon kung anaa na ba'y photostatic nga kopya nga gipagawas, nga igapresentar sa iglesia, usab. Nakabutang didto nga ang mga tinugyanan sa iglesia karon mao na sila ni Igsoong William Morgan, Igsoong Mike Egan, ug Igsoong Banks Wood, ug Igsoong Roy Roberson. Ug silang tanan lumolupyo ra niining siyudad, gawas kang Igsoong Roberson nga nagpuyo tungatunga sa duha ka siyudad. Nakita mismo sa Ginoo ang katakus niining mga kalalakin-an, ug sila nga mga tawo maayo'g kadungganan, ug ila nang gidawat karon ang katungdanan ingon nga mga

tinugyanan niini nga iglesia.

⁵ Ug dayon samtang gipahigayon kini nga panagtigum, gisultihan ko sa kaabag nga pastor nga kita, kinahanglan na nga mopili og bag-ong board sa mga diyakono, nga nahuman na kono ang termino niining mga kalalakin-an ug—ug mihawa na, maong kinahanglan na natong mopili og pipila ka dugang nga mga diyakono. Karon, ang iglesia. . . Ang paagi sa pagbuhat niini, puede nga, mopili ang board og mga diyakono, mga kalalakin-an nga ilang nakauban na ug nakita nga maayo'g kadungganan ug matarung nga tawo.

⁶ Halangdon kaayo ang katungdanan sa usa ka diyakono, ug usa ka dakung kadungganan kini ngadto sa Ginoo nga mahimong usa ka diyakono sa iglesia. Ug busa, didto sa miting niadtong miaging gabii, usa ka lalaki ang girekomenda kanako. Ug sa miting nga kauban ang pastor, niadtong misunod nga. . . niadtong miaging Biyernes, gikauyonan nga kining mga kalalakin-an maayo'g kadungganan ug matarung nga mga tawo.

⁷ Adunay ilang girekomenda nga usa ka batan-ong lalaki, apan dili gayud maingon nga kuwalipikado siya (dili tungod kay dili siya matarung nga tipo sa tawo), girekomenda siya sa usa sa mga talahurong tawo sa maong board sa mga tinugyanan. Pero niadtong nagka-istoryahanay mi sa pastor, ug akong gipangutana ang edad sa maong batan-ong lalaki, naa pa diay siya sa sugod pa lang sa iyang baynte anyos ang panuigon. Talahuron, matarung, ug tinuod gyud nga lalaki, pero nahibaloan namo nga ulitawo pa diay siya. Sumala sa gisugo sa Biblia ang usa ka diyakono kinahanglan nga usa ka minyo nga lalaki. Kinahanglan nga bana siya sa usa ka asawa.

⁸ Ug dayon aduna pa'y usa ka lalaki nga usa gayud ka tawo nga maayo'g kadungganan, kuwalipikado gyud unta kaayo alang sa maong katungdanan ug maunongon gyud nga tawo, sumala sa usa ka igsoon nga nagrekomenda kaniya. Apan sa dihang giusisa ang maong butang, bag-o pa diay kining igsoon sa niini nga Pagtoo, ug ang iyang asawa wala nagatoo Niini. Mao kana ang nagpadili-kuwalipikado kaniya sa maong katungdanan. Tungod kay kinahanglan nagpasakop ang tibuok niyang pamilya, kinahanglan pud nga anaa sila sa Pagtoo, kay kondili makamugna kini og panagbangi.

⁹ Ug ingon nga nagapatukod kita karon, ug atong gitinguha nga maplastar gayud kining maong iglesia. Ug isip pang-kinatibuk-ang tigdumala sa niining iglesia, kinahanglan kong masiguro nga magpabilin kini, nga nahiuyon sa Kasulatan, nga ang tanan nahisubay gayud sa Pulong.

¹⁰ Ug busa, tungod niana, gikauyonan sa board ug sa pastor, ug sa tigdumala, nga mopili gikan niini nga pundok sa mga tawo dinhi og pipila ka mga kalalakin-an nga sa among tan-aw maayo'g kadungganan ug matarung nga tawo. Amo lang

silang ipresentar. Ug kini, human niana, ang iglesia mismo ang mopili sa ila, pinaagi sa ilang pagboto. Ug human niana kining mga kalalakian-kinahanglan nga moserbisyo, kung sa tan-aw nila nga mahimo nilang dawaton kini nga katungdanan. Dayon hatagan sila og diyutay'ng panahon para mangatungdanan usà, aron makita nila kung gitawag ba gyud sila sa Ginoo. Ug kung sa ulahi, kung sa tan-aw nila nga dili sila kuwalipikado, nan, aduna sila'y katungod nga mo-resign sa katungdanan sulod sa pipila ka mga semana, para adunay usa ka tawo nga mahimong ipuli sa ilang puwesto.

¹¹ Labot pa, sa pagsugod sa rebaybal nga (kon itugot sa Dios) gusto kong ipahigayon dinhi niini nga tabernakulo sa diha nga makapahulay na ko, dayon akong—dayon akong . . . ato nang paga-ordenahan kini nga mga diyakono pinaagi sa pagpandong og mga kamot, ang mga diyakono ug ang tresurero niini nga iglesia. Pero kinahanglan una silang ibutang sa pangatungdanan ug—ug tan-awon kung okey ra ba sila niini ug kung mauyonan ba kini sa kongregasyon. Dayon kung kini—dayon kung okey ra kini sa parehong bahin, nan ato nang ordenahan kining mga tawhana aron mahimong diyakono, sa samang paagi nga gipili ang mga Tinugyanan.

¹² Soberanya kini ug balaod sa iglesia, pinasikad sa Pulong sa Dios. Busa, kana, dili puede nga ila lang basta isulti nga “Sa tan-aw ko kining lalaki ang mao'y kuwalipikado nga tawo,” dili kini ingon niana, “sa tan-aw ni Igsoong Neville kining lalaki mamahimong kuwalipikado nga tawo,” o “sa tan-aw sa board sa mga tinugyanan kuwalipikadong tawo kining lalaki.” Kinahanglan nga ang iglesia mismo! Walay bisan usa sa iyang kinaugalingon ang nagabuhat og ingon niana dinhi. Ang boto mismo sa iglesia. Usa man kini ka gawasnon nga iglesia.

¹³ Naguba sa baha niadtong 1937 kadtong daang orihinal nga mga lagda. Aduna ta'y mga kopya niini, ug hapit na nato kining isab-it sa bungbong dinhi, ang mga katungdanan sa mga tinugyanan, mga diyakono, mga tresurero, ug uban pa, sa pastor, sa mga kaabag, ug sa uban pa.

¹⁴ Pinaagi sa grasya sa Dios, gipahibalo kanako, nga usa ka gatus ka porsyento nga boto gikan sa board niining iglesia, nga ilang nakita nga si Igsoong Hollin Hickerson usa ka matarung, tawo nga maayo'g kadunggan, ug kuwalipikado sa niini nga posisyon sa pagdawat sa—sa dakung kadunggan sa pagka-diyakono niining tabernakulo.

¹⁵ Ingon man, nga nakita namo, ug pinaagi sa boto sa board, nga si Igsoong Collins nakita usab nga usa ka maayo'g kadunggan ug matarung nga tawo. Isip usa ka ministro, siya mismo, amo siyang gihangyo nga moanhi ug mahimong usa—usa ka diyakono sa iglesia; ug dili lamang diyakono, kondili kaabag mismo ni Igsoong Neville, ug siya tingali ang magdumala

sa Sunday school, o kaha mopuli sa panalagsa kang Igsoong Neville, o unsa man ang gitawag kaniya nga buhaton ingon nga kaabag ni Igsoong Neville. Si Igsoong Collins kana.

¹⁶ Ug, ingon man, nakita pud sa iglesia, og gikahimut-an, nga si Igsoong Tony Zabel, ingon nga usa ka maayo'g kadungganan ug matarung nga tawo, ug gikahimut-an gyud siya sa board sa mga tinugyanan ug mga pastor, para hangyoon siya nga dawaton ang katungdanan sa pagka-diyakono niining maong tabernakulo.

¹⁷ Ug gihangyo usab, ug nakita isip usa ka tawo nga maayo'g kadungganan taliwala kanato. . . (Dili . . . dili lang sila nakita ingon nga mga tawo nga maayo'g kadungganan, karon, pero mga gipili mismo sa board.) Si Igsoong Taylor nga taga-Henryville, o Memphis, sa pagkahibalo ko, taga-Memphis, Indiana. Dugay-dugay na pud siya nga nakauban nato, nga nangatungdanan ingon nga usher ug unsa man kutob sa mahimo niya. Nga tungod niana gikahimut-an siya sa iglesia, o sa board ug mga pastor, nga iyang pagadawaton ang—ang dakung katungdanan isip diyakono niini nga tabernakulo.

¹⁸ Ug gihangyo usab nga ang umagad ni Igsoong Mike Egan, si Igsoong—Igsoong Bob Harned, nga gipili sa board ug sa mga pastor, nga dawaton ang katungdanan isip tresurero niining maong tabernakulo, nga usa ka talahuron nga buluhaton, ug nagkinahanglan kini og hustisya ug dungog.

¹⁹ Sa pagbuhat niini, sa hunahuna ko, mga igsoon ko, nga ang pagtawag kaninyo dinhi, usa gayud ka dakung kadungganan alang kaninyo. Ug dili lang kana, kondili usa pud kini ka buluhaton.

²⁰ Niining higayona akong hangyoon si Igsoong Neville, ang atong kaabag, nga basahon ang mga kuwalipikasyon sa usa ka diyakono. Igsoong Neville, kung puede nimong basahon kini gikan sa Pulong sa Dios. [Ginabasa ni Igsoong Neville ang Unang Timoteo 3:8-13—Ed.]

[Ingon man usab ang mga diyakono kinahanglan nga magmaugdang, dili duha'g sinultihan, dili palainum og bino, dili maikag sa pagpanapi pinaagi'g limbong;]

[Nga nagabaton sa tinago sa pagtoo sa usa ka maputli nga kaisipan.]

[Ug kinahanglan nga sila usab pagasulayan una; unya paalagara sila ingon nga mga diyakono kung dili na sila mabadlonganon.]

[Ang ilang mga asawa usab kinahanglan nga maugdang, dili mga tigdaut og dungog sa uban, kondili mga mapugnganon sa kaugalingon, kasaligan sa tanang mga butang.]

[Ang mga diyakono kinahanglan taga ra'y asawa, ug maayo magdumala sa ilang mga anak ug panimalay.]

[Kay ang mga nagaalagad og maayo ingon nga mga diyakono nanghiagum sa ilang kaugalingon og dungganon nga kahimtang, ug may daku nga kaisug sa pagtoo nga anaa kang Cristo Jesus.]

21 Amen. Sa niining higayona hangyoon ko sa niining mga igsoon nga gitawag, nga kung mahimo ba silang moduol dinhi sa atubangan sa entablado sa makadiyut. Ug samtang atong iduko ang atong mga ulo sa makadiyut alang sa pag-ampo, hangyoon ko sila. . . Ug ang iglesia nahibalo na kung unsa kini, nga kini mao ang pagpili sa inyong board sa mga diyakono ug inyong tresurero.

22 Ginoong Jesus, uban sa maligdong, diosnon nga pagpamalandong nagaduol kami Kanimon karon. Nagaduol kami nga adunay pagtahod sa Imong Labing Balaan nga Pulong, nagaduol kami nga nagatoo nga “Nga ang pulong sa matag tawo bakak, apan ang sa Dios tinuod.” Ug mapasalamatan gyud kami Kanimon alang niini nga Iglesia nga gibayran na ni Jesus sa Iyang Kaugalingong bililhong Dugo, ug sa paghatag kanamo niini nga bilding aron kami makasimba.

23 Ug isip mga tigdumala niining matinud-anon nga panon, nga ang Espiritu Santo mismo ang nag-ordena kanamo, og naningkamot kami nga ipresentar sa niini nga kongregasyon ang usa ka maunongon, matarung nga pundok sa mga kalalakin-an nga among gitooan nga puno-sa-Espiritu ug andam alang sa maong katungdanan. Sama sa giingon kaniadto mahitungod sa board sa mga diyakono, “Pangita kamo sa taliwala ninyo, og lalaki nga maayo’g dungog ug nga adunay Balaang Espiritu, aron mao’y mobuhat niini nga buluhaton, sa pag-atiman sa mga balo ug sa mga ilo, sa pagpang-apod-apod og salapi, ug sa pag-atiman sa kaayohan sa iglesia.” Paglabay sa pipila ka mga katuigan, bag-o lang namo nabasa ang sinulat niadtong bantugan, dinihogan, balaang si Pablo, nga mao’y nagtakda sa deklarasyon sa mga Kasulatan mahitungod sa mga kinahanglanon sa maong mga posisyon.

24 Dios, pasidunggan mo kining mga kalalakin-an. Ug karon mao na ang higayon sa pagpili, Ginoo, ingon nga usa ka gawasnon nga iglesia, ingon nga lawas sa Ginoong Jesus, nga sila mao ang nagapili. Ug. . . [Blangko nga bahin sa teyp—Ed.] . . . ug pangunahi kini nga bahin sa buluhaton sa usa ka espesyal nga paagi, sa matarung ug balaan nga Ngalan ni Jesus.

25 Karon samtang nagduko ang atong mga ulo, dili lamang ang atong mga ulo kondili ang atong mga kasingkasing usab, ug sa matag miyembro sa iglesia dinhi, nga regular nga nagatambong dinhi ug nagasuporta pinaagi sa inyong mga ikapulo ug mga halad, nga giisip nga miyembro niini nga iglesia, samtang ang pastor ug ako, ang maong, magatan-aw lamang, ang kaabag nga pastor, si Igsoong Neville, ug ako ang magtan-aw, mao

nga mangutana ko kung nakita ba sa niini nga iglesia nga si Igsoong Taylor ingon nga usa ka matarung nga tawo ug takus, basi sa inyong pinakamaayo nga panghunahuna, aron mamahimong diyakono sa niining panon sa mga tawo dinhi? Ipahibalo ang inyong pag-uyon pinaagi sa pagpataas sa inyong kamot. [Mihunong si Igsoong Branham—Ed.] Sige. Karon kung adunay supak, ipataas pud ang inyong kamot. [Mihunong si Igsoong Branham.] Salamat.

²⁶ Aduna ba’y mga miyembro niini nga iglesia dinhi nga nakita si...ug ang tanan ba, nakita ninyo nga si Igsoong Hollin Hickerson ingon nga usa ka matarung ug tawo nga maayo’g kadungganan, ug usa ka tawo nga sa inyong tan-aw takus nga mahimong diyakono niining maong iglesia? Ipahibalo kung uyon kamo pinaagi sa pagpataas sa inyong tuong kamot. [Mihunong si Igsoong Branham—Ed.] Kung supak kamo, nan ipataas lang ang inyong kamot. [Mihunong si Igsoong Branham.]

²⁷ Nakita ba sa niini nga kongregasyon nga si Igsoong Collins ingon niana usab, usa ka matarung ug tawo nga maayo’g kadungganan, ug takus sa buluhaton nga mahimong diyakono sa niini nga iglesia? Mahimo n’yo bang ipataas ang inyong kamot. [Mihunong si Igsoong Branham—Ed.] Sige. Kung aduna’y supak, palihog ipataas ang inyong kamot. [Mihunong si Igsoong Branham.]

²⁸ Nakita ba sa niini nga kongregasyon si Igsoong Tony Zabel ingon nga usa ka tawo nga maayo’g kadungganan ug takus niini nga katungdanan, sa pagka-diyakono sa niini nga panon niining maong iglesia? Mahimo n’yo bang ipataas ang inyong tuong kamot. [Mihunong si Igsoong Branham—Ed.] Kung aduna’y supak, palihog ipataas ang inyong kamot. [Mihunong si Igsoong Branham.]

²⁹ Sa tan-aw ba niini nga kongregasyon nga si Igsoong Harned usa ka makiangayon ug matarung nga tawo, nga dugay-dugay nang nakig-uban kanato, aron mamahimong tresurero, sekretaryo-tresurero sa niini nga iglesia, aron magdumala sa mga panalapi ug magbayad sa mga bayronon? Kung mao man, ipataas ang inyong tuong kamot. [Mihunong si Igsoong Branham—Ed.] Kung aduna ma’y supak, ipataas ang inyong tuong kamot. [Mihunong si Igsoong Branham.]

³⁰ Gusto kong isulti sa—sa mga kaigsoonan nga nagabarug niining higayona, sa tiilan niining krus, nga kini nga iglesia, usa ka gatus ka porsyento (nga wala gayu’y misupak), nga nakita kamong tanan nga takus sa panan-aw sa Dios alang niining katungdanan kon diin gitawag kamo sa Dios.

³¹ Karon, kamo, sama sa gikaingon, “Kinahanglan nga masulayan usà sila, ug tan-awon kung sila nagtinguha niini nga katungdanan.” Sulod sa pipila ka semana, kon itugot sa Dios, mobalik ako aron pandongan sa akong mga kamot kining panon

sa mga lalaki, aron mahimo silang opisyal nga tinug-...o mga diyakono niini nga iglesia, ug tresurero.

Iduko nato ang atong mga ulo sa makadiyut:

³² Ginoo, malipayon kami karong gabhiona nga aduna pa'y kalalakin-an nga nabuhi sa kalibutan nga makahimo sa paglakaw nga diosnon niining kalibutana; mga diosnon kaayo nga ang usa ka tabernakulo, nga adunay estrikto nga mga lagda sama niini, makapili og lima ka kalalakin-an sa posisyon isip ilang mga lider, nga walay bisan usa nga misupak. Malipayon kami alang kanila, ug among gibati nga Ikaw nakigduyog kanamo sa paghimo niini nga mga desisyon, ang board ug kami nga mga pastor.

³³ Dios, panalangini kuni nga mga kalalakin-an. Ug hinaut nga magaalagad sila niini nga katungdanan uban sa tibuok nilang kasingkasing, sa pagkasayod nga kini magahatag kanila og dakung kadunggan sa Langit. Sa umalabot nga adlaw sa dihang pagasirhan na ang mga Basahon sa Langit, hinaut nga ang Basahon sa langitnong mga linalang ug halangdong Basahon sa Langit pagaablihan, hinaut nga ang ilang mga ngalan usa ka gatus ka porsyento anaa sa atubangan sa Dios ug sa Manluluwas ug sa tanang mga panon sa Langit, hinaut nga mao usab sa Iyang Ginghamian. Panalangini sila, Ginoo, ug hinaut nga magmatinud-anon sila sa pag-alagad niini nga katungdanan. Sa Ngalan ni Jesus nagapasalamat kami Kanimong alang kanila. Amen.

³⁴ Gusto kong lamanohon kamo, Igsoong Harned, ug Igsoong Zabel, ug Igsoong Collins, Igsoong Hickerson, ug Igsoong Taylor. Daku ang akong kalipay sa pagkahibalo nga nakapakig-fellowship kita sa niining dugay'ng panahon uban niining talahurong mga kalalakin-an. Panalanginan kamo sa Dios karon. Ug kita magkita-kita pag-usab, inig makapahulay na ko og gamay, sa akong pagbalik, ug tan-awon kung nahiangay ba kamo sa inyong katungdanan. Sige, sa ilang boto, sa akong tan-aw usa ka gatus ka porsyento, nga wala gayu'y misupak.

³⁵ Oh, wala ba kamo nalipay karon nga nakig-uban kamo sa mga tawo nga makahimo sa pagkinabuhi atubangan sa Dios, nga diosnon, ug magkinabuhi sa ingon-ana nga kabutang atubangan sa kalibutan niining panahona? Usa kini ka makahibulong nga butang.

³⁶ Ug malipayon gayud ako sa pagkahibalo karong gabhiona nga nagkaaduna ko'y pribilihiyo nga—nga nahimo nakong higala kuni nga mga kalalakin-an ug kuni nga iglesia. Nalipay kaayo ko nga ang Dios mitugot kanako nga malambigit ako sa Iyang Iglesia sa tibuok kalibutan. Oh, sila kadtong mga tinamay ug sinalikway ug ginalibak, ug sama sa akong gisulti kaganinang buntag sa akong mensahe, daw mga manglalapok ra, ang tan-aw sa kalibutan kanila, ingon nga “usa ka pundok sa mga

panatiko,” apan ang Dios nagatan-aw kanila ingon nga Iyang mga anak. Mao gyud kana akong gikalipay. Dili man nila masulti kaninyo kung pila ka milya ang gilay-on sa bulan. Dili man nila masulti kaninyo ang tanan nga solar system ug kung giunsa niini pagpamuhat. Pero aduna sila’y usa ka nahibaloan, nahibalo sila sa takna nga sila natawo pag-usab. Malipayon kaayo ko alang kanila.

³⁷ Ug sama sa usa ka mubo nga sambingay nga akong nakat-onan, ug idugtong ko kini karong gabhiona sa akong duha ka gagmay’ng anak nga babaye aron mas masabtan pa nato kini, aron himoon kining realidad sa atoa, aron masabtan gyud ninyo ang kahulogan niini. Usa ka buntag, pagbangon nako sa higdaanan. . . Anaa ang akong duha ka gagmay’ng batang babaye. Ang usa kanila mao si Rebekah, ug ang usa kanila si Sarah, ug silang duha maki-papa gyud.

³⁸ Ug aduna pud ko’y gamay’ng batang lalaki, si Joseph. Gikan ko niadto sa Chattanooga, gikan sa usa ka panagtigum usa ka gabii, samtang gikan ako didto alang sa katapusan niadtong daku nga buluhaton. Ug anaa ko sa—sa sakyanan, nagabiyaye kauban sa akong kamagulangang bata nga lalaki, si Billy. Ang iyang asawa ug si Meda anaa pud sa sakyanan, ug mga bata kong babaye. Ug samtang nagabiyaye kami, wala gyu’y mitingog sulod sa mga pipila siguro ka bloke. Nagwali man gud ko og makapasakit kaayo sa mga tawo niadtong gabhiona bahin sa ilang ginabuhat. Ug wala gyu’y mitingog niadtong higayona. Ug miduol ang gamay nakong si Joseph ug migunit sa akong abaga, ingon niya, “Daddy, nagwali gyud ka og ayo karong gabhiona!”

³⁹ Ug kaganinang buntag, samtang nangandam na ko sa akong paggikan ug moanhi na dinhi sa Eighth ug Tenth Street, sa . . . o sa Penn ug Tenth, diay, wala gyu’y sulti-sulti, ang akong asawa ug ang duha nako ka batang babaye. Ug migunit na pud sa akong abaga ang akong gamay’ng si Joseph, ingon niya, “Daddy, grabe, ganahan gyud ko niadtong giwali nimo karong buntaga,” ingon pa niya.

Miingon ko, “Buena, naa diay ko’y usa ka tigdayeg, kana’y akong batang lalaki.”


⁴⁰ Ug bahin sa mubo natong ginahisgotan. Pagbangon nako usa ka buntag, samtang naglingkod ko sa kwarto, ang akong gamay nga si Becky mikalit lang og dagan padulong sa ako, dayon, misabak siya nako ug gigakus ko niya, ug maki-papa gyud kaayo ni siya. Ug ginagakus ko niya. Ug ang akong gamay nga si Sarah mibangon usab sa iyang higdaanan nga naka-pajama pa ug nga, dayon, misunod pud. Siya kadtong adunay kapihon-nga-mata.

⁴¹ Moingon dayon si Becky, “Oh, Sarah, dili na kinahanglan nga moduol ka pa, tungod kay gigakus na nako si Daddy. Sa ako ra gyud si Daddy!” Ug ang gamay nga Sarah, nagmug-ot dayon siya og diyutay, og mipiyong iyang gamay’ng kapihon nga mata.

Misenyas ko og *ingon niini* ug gituy-od nako ang akong pikas tuhod, ug miduol siya ug misabak niini.

⁴² Mas taas ang mga bitiis ni Becky, maong mosangyad kini sa salog. Samtang si Sarah gamay pa og matuwang pa gyud siya, maong gigakus nako si Sarah. Milingi si Sarah kang Becky ug miingon, “Becky, gigakus man nimo si Daddy, pero ginagakus man pud ko ni Daddy!”

⁴³ Ug sa hunahuna ko ingon niana ra pud kini dinhi. Wala man ta mahibalo sa tanang teolohiya ug sa tanang mga Griyegong pulong, wala man mahibalo kining pundok sa mga lalaki. Pero adunay usa ka butang nga sigurado gayud, nagatoo ako nga si Jesus nakagakus gayud *kanatong* tanan. Amen.

Sige, Igsoong Neville. 

58-0720E Ang Pagpahimutang Sa Mga Diyakono
Branham Tabernacle
Jeffersonville, Indiana U.S.A.

CEBUANO

©2024 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org